

馭

交

紀

一





馭 交 紀

(一)

張鏡心編
冒起宗訂考

馭交紀卷之一

欽差總督兩廣軍務兼理糧餉帶管鹽法兼巡撫廣東地
方兵部右侍郎兼都察院右僉都御史 臣張鏡心編考
分巡嶺西道整飭兵備廣東按察司僉事 臣冒起宗訂

帝堯申命羲叔宅南交。

尙書註云。南交。南方交趾之地。安南。卽古交趾。○禮王制云。南方曰蠻。雕題交趾。有不火食者矣。○
山海經云。交趾國人交經。○東漢書云。男女同川而浴。故曰交趾。其疆域東西相距一千七百里。南
北相距二千八百里。東接廣東欽州。西界雲南老撾宣尉司。南帶占城盡海壘。北抵廣西憑祥州。其
山則句漏。佛跡雲屯。最峻。江則來蘇。龍門。而富良最大。其俗獠夷雜居。不知禮義。椎結翦髮。文身跣
足。好食檳榔。口赤齒黑。暑熱好浴于江。便舟。善水。平居不冠。立常叉手。席坐盤足。謁尊貴跪膝三拜。
待客以檳榔。嗜酸鹹海味。以富爲雄。爭奪兼并。役屬貧弱。俘掠不忌。一年再稻。一歲八蠶。桑麻蔽野。
不解種麥。多魚鹽之利。其服役有頭飛獠子。赤褐獠子。鼻飲獠子。皆窟居巢處。善飲酒。擊銅鼓。鼓初
成。置庭中。招同類來者盈門。豪富女子以金銀釵擊鼓。卽留與主人。其譯語呼天爲雷。地爲得。日爲
霧。月爲燙。

考帝王其德無外。譬天地之持燾。故阻深暗習之區。虧蔽日月。日月弗遺也。堯命宅交。舜南巡至蒼梧之野。此在古初然矣。盛世不勤遠。詎謂遠弗暨哉。

周成王六年。交趾南越裳氏重三譯來朝。

越裳。卽占城。或曰九真。重三譯而來。獻白雉。曰。道路悠遠。山川阻深。恐一使不通。故重三譯而來朝。知中國之有聖人也。使者還。迷其歸路。周公錫以駟車五乘。皆爲向南之制。越裳使者載之。期年而至其國。故指南車常爲先導。示有以服遠人而正四方。○風俗通云。周公作越裳操。以紀其來。

考三代夏征有苗。在荊楚間。則百粵之遠可知也。商時編髮之蠻。重譯入朝。至周迺來。越裳在交趾外。其言天之無烈風淫雨三年。受命黃耆。三譯求通。何其誠也。而周公謙讓曰。德澤不加。君子不臣。其人嗚呼。周之德其至矣乎。

秦始皇三十二年。秦師及南越人戰。秦師敗績。復遣趙佗任囂擊平之。置三郡。以交趾屬象郡。

淮南子人間訓云。秦皇利越之犀角。象齒。翡翠。珠璣。乃使尉屠睢。將樓船之士攻越。監祿鑿渠運糧。深入越地。越人擊之。秦兵大敗。至是遣囂等略取陸梁地。爲桂林。南海。象郡。而交趾屬象郡。置長吏。三十三年。以任囂爲南海郡尉。趙佗爲龍川縣令。以謫徙民戍五嶺。交趾合

漢書。秦使尉佗將謫徙民五十萬人。戍五嶺。與越雜處。

二世皇帝元年。以女無夫家者萬五千人。予南越。秦亂。趙佗擊交趾。并之。

史記秦使尉佗安百越。佗知中國勞極，上書求女無夫家者三萬人爲士卒衣補。秦可其萬五千人。于是百姓離心，欲亂者十家而七。時南海尉任囂病且甚，召趙佗語曰：「聞陳勝等作亂，豪傑叛秦，相立南海，雖僻遠亦一州之主，可爲國也。」囂卒，佗殺秦所置吏，聚兵絕道自守，遂并交趾地，自稱爲南武王。

考秦北築長城遮胡，胡禍秦壤相錯也。島夷遼隔，不通中國。或曰：「山海之區，犀象珠璣在焉。」秦利其有，于是出五軍開交廣，其初民皆匿叢薄中與禽獸處，莫肯爲秦。未幾內亂，自置之吏叛弗屬，然斥地闢壤自秦始也。

漢高帝十一年，遣大中大夫陸賈立故秦南海尉趙佗爲南越王，受封稱臣。

十二年，南越擊交趾。

賈初至，尉佗魑結箕踞見賈。賈因說佗曰：「足下中國人，親戚墳墓在真定，今足下反天性，棄冠帶，欲以區區之越與天子抗衡，禍且及身矣。天子聞君王王南越，將相欲移兵，天子憐百姓勞苦，且休之，遣臣授君印，剖符通使。君王宜郊迎北面稱臣，乃倔彊于此。漢聞掘燒君王先人家墓，夷殄宗族，使一偏將將師臨越，殺王如反覆手耳。于是佗乃蹶然起坐，謝賈曰：「居蠻夷中久，殊失禮義，今令我聞所不聞，幸甚。」賈遂拜佗爲南粵王，令稱臣奉漢約。自是佗始變魑結，襲冠冕焉。

高后五年春，趙佗反于南越，自稱南武帝。交趾合。

時有司請禁越關市鐵器。佗曰：高皇帝立我通使物，今后聽讒臣，別異我，絕器物，此必長沙王計。欲倚中國擊滅南越也。于是自稱帝，發兵攻長沙邊，敗數縣。

七年，遣將軍周竈擊南粵。交趾合。

將軍隆慮侯竈帥兵出，會暑溼，士卒大疫，不能險嶺，歲餘。高后崩，卽罷兵。○書伐越始此。

文帝元年，賜南越王佗書。佗去帝號，稱臣奉貢。

漢書：文帝爲佗親冢，在真定者，置守邑。歲時奉祀，官其從昆弟，厚賜寵之。以陸賈爲太中大夫，賜佗書曰：皇帝謹問南粵王。甚苦心勞意，朕高皇帝側室之子，今卽位，乃者聞王遣將軍隆慮侯書，求親昆弟，請罷長沙兩將軍。朕以王書罷將軍博陽侯，親昆弟在真定者，已遣人存問，修治先人冢。前日聞王發兵於邊，爲寇災不止，當其時，長沙苦之，南郡尤甚。雖王之國，庸獨利乎？必多殺士卒，傷良將吏，寡人之妻，孤人之子，獨人父母，得一亡十，朕不忍爲也。願與王分棄前患，終今以來，通使如故。故使賈馳諭告王朕意，上楮五十衣，中楮三十衣，下楮二十衣。遣王願聽樂娛憂，存問鄰國。佗恐，乃頓首謝，願奉明詔，長爲藩臣，奉貢職。賈還報，文帝大悅。

武帝元鼎五年，擊南越。平之，遂定其地爲南海、蒼梧、鬱林、合浦、交趾、九真、日南七郡。又略得珠崖、儋耳，通爲九郡，置交趾刺史領之。

孝景後元二年，佗薨，子孫傳立四世。孝武建元四年，閩越王郢興兵南擊佗，孫胡上書曰：東越擅興。

兵侵臣。臣不敢相攻。唯天子詔之。於是天子多南越義。守職。約遣兩將軍往討。兵未險嶺。閩越弟餘善殺郢以降。因遣嚴助往諭意。胡頓首曰。天子乃已誅閩越。死亡以報德。遣子嬰齊入宿衛。元鼎四年。遣諫大夫終軍往諭南越王光入朝。王欲行。其相呂嘉諫之不聽。嘉遂攻殺王及漢使者。而立王異母兄術陽侯建德。五年秋。以衛尉路博德爲伏波將軍。出桂陽。下湟水。主爵都尉楊僕爲樓船將軍。出豫章。下橫浦。故歸義。粵侯二人爲戈船。下瀨。將軍出零陵。或下灘水。或抵蒼梧。使馳義侯因巴蜀罪人發夜郎兵。下牂牁江。咸會番禺。討南越。滅之。先是。越王遣二使者治交趾。九真。二使者聞漢兵至合浦。籍其戶口以降。卽拜二使者爲交趾。九真太守。置交趾領之。是時雖置郡縣。而猶仍夷俗。不及漢文書。第羈縻耳。○史記作越。○漢書作粵。○邱濬曰。秦之南海。漢之合浦。及珠崖。儋耳。今廣東之地也。秦之桂林。漢之蒼梧。鬱林。今廣西之地也。秦之象郡。漢之九真。日南。交趾。今安南之地也。元封五年。置交趾。部刺史。領七郡。治廣信。

大事記云。元封五年。置刺史。掌奉詔條察州秩六百石。置交趾刺史。別于諸州。令持節治蒼梧。征和四年。交趾叛。殺珠崖太守孫幸。幸子豹討平之。

宣帝神爵三年交趾反。

甘露二年。交趾等郡反。夏四月。遣護軍都尉張祿將兵擊之。

漢書。交趾。珠崖。自初爲郡。至昭帝始元二十餘年。凡六反。神爵三年。三縣反。至是九縣皆反。○綱鑑

曰武帝滅南越置珠崖儋耳郡率數年一反漢輒發兵擊定之至元帝初元三年南縣大叛連年不定上博謀于羣臣待詔賈捐之曰臣聞堯舜聖之盛禹入聖域而不優以三聖之德地方不過數千里東漸于海西被流沙朔南暨聲教言欲與聲教則治之不欲與者不治也臣願遂棄珠崖專用恤關東爲憂上乃棄珠崖

平帝元始二年以錫光守交趾

光武建武五年交趾牧鄧讓率七郡守相遣使入貢因封錫光爲列侯以任延爲九真太守教民耕種冠履

通鑒王莽末交趾諸郡閉境自守岑彭素與交趾牧鄧讓厚善與讓書陳國家盛德又遣偏將軍屈充移檄江南班行詔命於是讓與江夏太守侯登武陵太守王堂桂陽太守張隆長沙相韓福零陵太守田翕蒼梧太守杜穆交趾太守錫光等相率遣使貢獻○任延以交人射獵爲業不知耕鑄田器教之墾闢樹藝無嫁娶禮乃著令以年齒相配於是產子始知種姓多名子爲任徼外蠻夷皆慕義納款舉向華風云

十三年春以蘇定爲交趾太守

定至交趾以法繩下徼側徼貳忿而反

援旣下交趾。鑿南塘通九真。置望海大康縣。立城郭井邑。銅柱一在欽州。一在思明府。而日南林邑。西屠夷國。大浦口。亦有建者。其詞曰。銅柱折。交趾滅。交人往來。疊石以固之。自是銅鼓銅馬。始入中華矣。

明帝永平元年。賜交趾計吏金帛。

東觀漢紀。交趾部刺史上計。時張重仲篤者爲日南計吏。至京。召對。賜金帛。後位通顯。章帝建初八年。開交趾入貢嶠道。

通鑑。會稽鄭弘爲大司農。時交趾七郡貢獻。皆從東冶汎海而至。風波艱阻。沉溺相繼。弘奏開零陵。桂陽。嶠道。自是夷通。遂爲常路。

和帝永元十二年。日南象林蠻反。郡兵討破之。

順帝永和二年。南蠻反。交趾刺史樊演發九真交趾兵討之。秋七月。交趾九真兵反。

漢書永和二年。日南象林徼外蠻夷區憐等數千人。攻象林縣。燒城寺。殺長吏。交趾刺史樊演發交

趾九真二郡兵二萬餘人救之。兵士憚遠役。遂反。會侍御史賈昌使日南。卽與州郡并力討之。

永和三年。日南夷爲梗。九真太守祝良。交趾太守張喬。招降之。

廣西通志云。永和中。日南蠻夷爲梗。朝議發荆。揚諸郡兵討之。中郎李固駁之曰。荆揚盜賊盤踞。蠻夷未輯。不可一也。兗豫之人。徵發萬里。必致叛亡。不可二也。南州溼暑瘴氣。致死亡者十必四五。不

可三也。遠涉疲勞。比至嶺南。不復堪戰。不可四也。軍行三十里。程而去日南九千餘里。三百日乃到。計人廩五升。用米六十萬斛。不可五也。設軍到而死亡者衆。當復更發。此爲刻割心腹。以補四支。不可六也。九真日南。相去千里。猶尙不堪。況苦四州以赴萬里。不可七也。前中郎將尹就討益州叛羌。益州諺曰。虜來尙可。尹來殺我。後就徵還。以兵付刺史張喬。喬因其將吏旬月之間。破殄寇虜。此發將無益之效。州郡可任之驗也。宜更選勇略仁惠堪任將帥者。爲刺史太守。帝從固議。卽拜祝良爲九真太守。張喬爲交趾刺史。喬至。開示慰誘。並皆降散。良單車入賊中。設方略。招以威信。望風請降者數萬人。繇是嶺以外復平。○邱濬大學衍義補曰。李固此議。言南方用兵之病弊。切中事情。使後世讀史者至此。灼然如親在行間。目擊其事。千古如一日也。

桓帝延熹三年。以夏方爲交趾刺史。冬十一月叛蠻降。

延熹八年。桂陽賊入蒼梧。執交趾刺史葛祗。

祗旣爲賊所執。死之。蒼梧太守張敍棄市。坐縱賊不護衛也。

靈帝中平元年。交趾反。執合浦太守來達。刺史賈琮撫平之。

漢書。舊交趾土多珍產。前任刺史率多無清行。吏民怨叛。中平元年。交趾屯兵反。執刺史及合浦太守來達。自稱柱天將軍。靈帝特勅三府精選能吏。有司舉琮爲交趾刺史。琮到部。移書告示。各使安其資業。招散蠲徭。誅刺渠帥。選良吏守郡縣。百姓以安。巷路爲之歌曰。賈父來晚。使我先反。今見清

平吏不敢飯。

獻帝建安元年，交趾太守士燮署其弟壹、雋、武三人爲合浦等郡太守。

交趾刺史朱符爲夷賊所殺，州郡擾亂。燮乃表壹領合浦，次弟徐聞、令雋領九真、武領南海，俱太守。八年春，改交趾爲交州，增置州牧。

交廣記云：刺史張津令交趾太守士燮表言十二州皆州，而交獨交趾刺史，何不平等？臣昧死以請，改刺史爲州牧，詔許之。拜津交州牧，後仍復爲州刺史。

十五年，徙交州刺史治南海。

交廣春秋云：交趾初治羸隲縣。元封五年，移治蒼梧郡廣信縣。建安十五年，移治南海郡番禺縣。○王範云：刺史治在交州。漢末移南海。

十六年，孫權交州刺史步騭殺劉表所置蒼梧太守吳巨及其都督區景，遂入南海。

時道不通，吳巨擁衆數千，權以騭爲交州刺史，不敢入。先使諭巨，巨納之。後悔，騭以兵少，恐不能存。巨有都督區景，勇略與巨等，騭惡之，陰使人請巨，巨往戒景勿詣騭。騭固請景，景又往，乃俱斬于中庭。於是統兵二萬，下取南海。

後漢昭烈帝章武元年，帝在蜀，以庾降都督李恢持節領交州刺史，入于平夷。廣州平夷縣與蜀江通，故恢遙領交州，平夷住焉。

禪帝建興四年。吳大帝孫權黃武五年。吳分交州置廣州。徙交州治龍編。俄復舊。○魏與晉亦更置官吏。不能相統

一

七年夏。詔以交州屬吳。徵李恢還。

孫權初受魏九錫之命。亦以持節督交州領荊州牧。因有交趾太守孫贇貪暴。郡吏呂興殺贇。九真日南俱叛。降晉。權因呂岱言交趾遠。乃分合浦以北。南海蒼梧鬱林高涼四郡爲廣州。卽以岱爲刺史。交趾太守士燮卒。權以其子徽爲九真太守。以陳時代燮。戴良爲交州刺史。徽不奉命。舉兵以拒良等。岱討平之。于是除廣州。復爲交州如故。

吳景帝孫休永安七年。秋七月。吳復分廣州置交州。增入高興。

吳烏程侯孫皓建衡元年。遣將薛珣陶璜復取交趾。殺晉所置守將。日南皆還吳。增置新昌武平九德三郡。吳亡。歸晉。晉因之。

董份曰。漢盛時。武帝遣伏波樓船二將。率十萬師征定嶺南。分其地爲郡。而未幾輒叛。及元帝而珠崖乃大叛。益遣都護以下十一人興大兵。歷數年。費以三萬萬計。弗能討罷之。而漢亦中衰。夫粵數反覆好亂。自古記之矣。

考漢承秦後。王尉陀交越凡四世。割據者九十餘年。所謂因而羈縻非耶。迨樓船伏波之師再舉。闢粵交趾九真日南盡歸漢。稍稍道以禮法。夷漸爲華。厥功爛焉。然叛服不常。中國殫匱。初元逾海之軍。

費三萬萬。又復不濟。楊雄云。朱崖之棄。捐之力也。是耶非耶。李固之議。固賢于十萬師遠矣。比漢末。鞭之不及。亦其地勢然哉。

晉武帝太康元年。詔以滕脩爲安南將軍廣州牧。

晉書脩討郭馬未克。而王師伐吳。脩率衆赴難。至巴邱。聞皓已降。乃縞素流涕而還。與廣州刺史閭豐。蒼梧太守王毅。各送印綬。詔以脩爲安南將軍廣州牧。持節都督如故。封武當侯。加鼓吹。委以南方事。

明帝太寧元年。梁碩陷交州。刺史王諒死之。

通鑑王敦以王諒爲交州刺史。使殺新昌太守梁碩。碩舉兵圍龍編。陶侃遣兵救交州。未至。碩殺諒。成帝咸和三年。前交州刺史張璉反。進攻廣州。鎮南司馬曾總等擊破之。

穆帝永和四年。交州刺史阮敷擊林邑。破之。

通鑑林邑寇九眞。殺士民殆盡。桓溫遣督護滕駿帥交廣兵擊之。爲所敗。至是。阮敷討之。破五十餘壘。

升平三年。交州刺史溫放之。集兵至南海。破林邑而還。

晉書放之。始安公嶠之子也。爲給事黃門侍郎。以貧求爲交州。朝廷許之。初。林邑范文攻陷日南。害太守夏侯覽。以尸祭天。阮敷不能成功。議用廣州兵。放之既至南海。甚有威惠。將征林邑。交趾太守

杜寶別駕阮朗不從。放之以其阻衆。誅之。勒兵而進。參黎耽涼並降。遂破林邑。
孝武帝太元五年十月。九真太守李遜據交州反。

太元六年秋七月。交州太守杜瑗斬李遜。交州平。

安帝隆安三年。林邑范達陷日南。九真。遂寇交趾。太守杜瑗討破之。

宋文帝元嘉九年。遣使巡交廣。

元嘉二十三年。交州刺史檀和之伐林邑。

明帝泰始四年。交州人李長仁據州叛。

昇明三年。以南海太守沈煥爲交州刺史。交州發兵拒之。

通鑑宋以煥爲交州刺史。更以叔獻爲寧遠司馬。武平。新昌。二郡太守。叔獻旣得朝命。人情服從。遂發兵守險。不納煥。煥停鬱林。病卒。四月。齊王受禪。七月。卽以叔獻爲刺史。

齊世祖蕭蹟永明八年。以伏登之爲交州刺史。

綱目分註云。交州刺史房法乘。專好讀書。嘗屬疾不治事。自是長史伏登之得擅權。改易將吏。法乘聞之大怒。繫登之於獄。登之厚賂法乘妹夫崔景叔得出。因將部曲襲執法乘囚之。啓法乘心疾。不任視事。詔逮法乘還。而以登之知交州事。

梁武帝蕭衍大同元年。安南將軍蘭欽爲前刺史蕭恬所殺。

梁書。欽將集廣兵征交州。復啓歐陽頔同行。欽既至任所。前刺史南安侯恬權行州事。冀得卽眞。聞欽至。厚貨廚人。塗刀以毒藥。削瓜進之。欽及愛妾俱死。

大同五年冬十月。彗出南斗。

文獻通考。彗出南斗。長一尺餘。東南指。漸長一丈餘。占曰。吳越有兵。其後李賁稱帝於交州。發吳越兵討之。

大同七年。交州李賁反。刺史蕭諮出奔越州。遣越州刺史陳侯等。會廣州兵討之。

通鑑。交趾李賁。世爲豪右。仕不得志。有弁韶者。富於詞藻。詣選求官。吏部尙書蔡樽。以弁姓無前賢。除廣陽門郎。韶恥之。賁與韶還鄉里。會交州刺史武林侯諮。以刻暴失衆心。時賁監德州。因連結數州豪傑俱反。諮輸賄于賁。得奔越州。凡賁移檄啓事。皆韶之辭也。上遣越州刺史陳侯。羅州刺史寧巨。安州刺史李智。愛州刺史沅漢。同征李賁。諮又奔廣州依蕭暎。止遣諮與暎會兵討之。

中大同元年。陳霸先敗李賁於交州。

陳書。六月。軍至交州。賁衆數萬。於蘇歷江口立城柵。以拒官軍。暎推霸先爲前鋒。所向摧陷。賁走典徹湖。於屈獠界立砦。大造船艦。充塞湖中。衆軍憚之。頓湖口不敢進。霸先奮勒所部兵乘流先進。衆軍鼓譟俱前。賊衆大潰。

太清元年。陳霸先從交州刺史楊暎討李賁。平之。陳書。賁竄入新昌屈獠洞中。屈獠斬賁。傳首建康。

簡文帝大寶元年。以陳霸先爲交州刺史。

陳武帝霸先永定二年。以歐陽頔爲都督交廣等十九州諸軍事。刺史。

陳書頔盡有越地。改授都督廣交越成定明新高合羅愛建德宜黃利安石雙十九州諸軍事。

隋高祖仁壽四年。交州俚帥李佛子作亂。遣總管劉方討平之。

恭帝侑義寧二年。左武衛大將軍馮盎據嶺表。附于林士宏。是年梁主銑遣寧長真帥師伐交趾。

唐書盎高州良德人。洗氏夫人之孫也。仁壽初爲宋康令。潮成等五州獠叛。盎馳至京師請討之。文帝詔左僕射楊素與論賊形勢。素奇之。曰。不意蠻夷中乃生是人。卽詔盎發江嶺兵擊賊。平之。拜漢陽太守。還嶺表。嘯署酋領有衆五萬。以蒼梧高涼珠崖之地。附於林士宏。○通鑑銑士宏各遣人招交趾太守邱和。和不從。銑遣寧長真帥嶺南之兵。自海道攻和。和欲出迎。司法書佐高士廉謂城中勝兵足以當之。遂以士廉爲軍司馬。將水陸諸軍逆擊破之。長真僅以身免。盡俘其衆。旣而得煬帝凶問。乃以郡附於銑。始安郡丞李襲志被攻城陷。爲銑所虜。於是東自九江。南盡交趾。銑皆有之。勝兵四十餘萬。○陳隋之間。或改九真爲愛州。日南爲驩州。或置交州總管安南都督府統之。○安南之名自此始。

王慎中曰。三代以還得南粵者。惟漢文帝降附尉佗。爲近于帝王之德。而經制未備。迨兩伏波將軍之師誅伐蕩定。然建武之君。猶出于廣土之意。宜其民不恆于服。而輒繼以叛。蓋五嶺所表荊揚之

餘域爲德之所懷。而力有不得致者。三代以前是也。後雖力足以致。而不純于德。其迭有叛服之跡。則漢事可觀已。吳晉不奄北土。有事于南服尤勤。以其偏安之統。其事雖勤。無足多述也。考交州在嶺南最遠。又反覆善變。自晉而後。偏安之業。更姓革代。南人占望背向。漢法不能盡行矣。